

Viva sin il bun e bler vin!

Grischun: Vendemia 2015

DA GION NUTEGN STGIER / ANR

■ **Buna raccolta tar la vendemia en noss chantun cun ina qualitat excellenta. Il dumber tar la vendemia munta a 21 140 hl. Quai èn tuttina 2,8 milliuns buttiglias da vin. Il cuntegn da zutger schea tar las ivas «Pinot Noir» 98 grads Öchsle.** L'aura da bellezza durant l'entira stad ed er anc èn ils mais da settember ed october ha er gè ina influenza sin la vendemia da quest onn en il Signuradi. La vendemia sezza è dentant stada duas emnas pli baud che usità. Da racltar las ivas saja stà in vair plaschair, conferman ils viticulturs grischuns, ina raccolta senza favugn e cunzunt ina raccolta che haja cuzzà be paucs dis. Ivas saunas e da buna qualitat, quai saja il plaschair da la vendemia 2015. En il Grischun avain nus 53 sorts ivas, uschia che la vendemia ha cuzzà dals 7 da settember fin ils 31 d'october. La raccolta principala è stada davent dals 28 da settember fin ils 3 d'october. En quels sis dis han ils viticulturs e lur numerus gidanters racoltà per di tranter 211 e 277 tonnas. La vendemia da las ivas «Riesling-Silvaner», ina iva ch'è fitg baud madira e cun 8% da la surfatscha d'ivas l'impurtanta sort tar il vin alv, ha cuzzà in mais dals 10 da settember fin ils 10 d'october. Bunamain diesch dis pli tard



Damain kilos ivas, dentant da buna qualitat e quai fa plaschair er al viticultur Reto Ruof da Jenins.

FOTO G. N. STGIER

han las ivas da la sort «Pinot Noir» (74% da la surfatscha) cuntanschì l'optimala madirezza. Las emprimas ivas da quella sort han ils viticulturs racoltà ils 17 da settember e las davosas a la fin d'october.

2,8 milliuns kilos ivas

Tar las ivas «Riesling-Silvaner» han ins mesirà in cuntegn da zutger dad 83 grads Öchsle e tar las ivas «Pinot Noir» schea quel tar 98 grads Öchsle, quai ch'è ina valur excellenta, ditg auter da buna qualitat. Racoltadas èn vegnidas 2,8 milliuns kilos ivas, quai che dat a la fin finala 21 140 hl vin. Dapi l'onn 2000 è il 2009 stà cun 25 714 hl vin il meglier onn. La raccolta 2015 giascha per 5% sut la media da diesch onns. Da quel dumber da las ivas racoltadas vegnan fatgas 2,8 milliuns buttiglias vin da 7,5 dl, ubain 15 buttiglias da vin per abitant da noss chantun. Cun metter ina buttiglia da vin dasper l'autra èn quai tuttina 258 km, quai che correspunda al traject da Cuira a Geneva. Il motiv che la raccolta da la vendemia è sut la media dals davos onns è che la pumaraida è stada pli pitschna pervia dal sitg, uschia che mintga iva singula pasava pli pauc. Tuttina è la qualitat da las ivas fitg buna, uschia che en ils tschalers da vin sa sviluppescha e madira ina buna qualitat.